

Sinerissap qanittuani qaleralinniarneq pillugu Namminersorlutik Oqartussat nalunaarutaat

Aalisarneq pillugu Inatsisartut inatsisaanni nr. 18, 31. oktober 1996-imeersumi, ilaatigut Inatsisartut inatsisaatigut nr. 5, 21. maj 2002-meersukkut, Inatsisartut inatsisaatigut nr. 5, 4. juni 2012-imeersukkut, Inatsisartut inatsisaatigut nr. 12, 13. december 2012-imeersukkut, Inatsisartut inatsisaatigut nr. 18, 3. juni 2015-imeersukkut allannngortinneqartumi kingullermillu Inatsisartut inatsisaatigut nr. 28, 28. november 2016-imeersukkut allannngortinneqartumi § 10, § 10a, § 10b, § 13, imm. 2 aamma imm. 3, § 23, § 33, imm. 1, nr. 3 aamma imm. 2 aamma § 34, imm. 3 naapertorlugit aalajangersarneqarpoq:

Atuuffi

§ 1. Sinerissap titarnerullu aalisarnikkut oqartussaaffiup tunngaviusumik killingata 3 sømilinik avataaniittup akornanni angallatit 75 BRT/120 BT-mit mikinerusut atorlugit inuussutissarsiutigalugu qaleralinniarnermut nalunaarut atuuppoq.

Aqutsiveqarfiit

§ 2. Sinerissap qanittuani qaleralinniarnermi aqutsiveqarfiit ilanngussaq 1 naapertorlugu aalajangersarneqassapput.

Inuussutissarsiutigalugu qaleralinniarnermi angallatit

§ 3. Aqutsiveqarfinni Upernavimmi, Ummannami Qeqertarsuullu Tunuani angallatit tamarmiusumik (l.o.a.) 15,00 meterinit takinerusut inuussutissarsiutigalugu qaleralinniaqqusaanngillat. Angallatilli 19,99 BRT/31,99 BT-mit anginerunngitsut ukiumilu pissassiiviusumi qaangiuttumi aqutsiveqarfinnut Upernavimmut, Ummannamut Qeqertarsuullu Tunuanut akuersissutaateqarsimasut sulii aqutsiveqarfinnut pineqartunut akuersissummik tunineqarsinnaapput.

Akuersissutit, pissassiissutit aqutsiveqarfillu

§ 4. Umiatsiaaqqat tamarmiusumik (l.o.a.) 6 meter tikillugit takissusillit atorlugit inuussutissarsiutigalugu qaleralinniassagaanni, tamatumunnga akuersissummik peqarnissaq piumasaqaataavoq.

Imm. 2. Nalunaarut manna malillugu umiatsiaaqqanut akuersissutit uku tunniunneqarsinnaapput:

1) Aqutsiveqarfinmi 47-imi, tassa Qeqertarsuup Tunuani, Ummannami Upernavimmilu, umiatsiaaqqat

atorlugit qaleralinniarsinnaanermut akuersissut. Akuersissutit piffissamut killilerlugit ataatsimullu pisarineqarsinnaasut qummut killilerlugit tunniunneqartarput, tak. § 5, imm. 2.

2) Aqutsiveqarfimmi 46-imi, tassa ilanngussami 1-imi nalunaarneqartutut aqutsiveqarfinni allani, umiatsiaaqqat atorlugit qaleralinniarsinnaanermut akuersissut. Akuersissutit piffissamut killilerlugit ataatsimullu pisarineqarsinnaasut qummut killilerlugit tunniunneqartarput, tak. § 5, imm. 3.

Imm. 3. Imm. 2, nr. 1 malillugu akuersissummik pigisaqartoq, peqatigitillugu imm. 2, nr. 2 malillugu qaleralinniarsinnaanermut akuersissummik tunineqarsinnaanngilaq.

Imm. 4. Imm. 2, nr. 2 malillugu qaleralinniarsinnaanermut akuersissummik tunniussinermi, peqatigitillugu saarullinniarsinnaanermut akuersissummik tunniussisoqartarpoq.

Imm. 5. Aalajangersagaq taanna malillugu akuersissut ukiumut ataatsimut atuuttussatut tunniunneqassaaq. Uumassusilerisut biologit siunnersuinerat ukiunit arlalinnut atuuppat, akuersissutini ukiunut arlalinnut atuuttunik tunniussisoqarsinnaavoq.

Imm. 6. Aqutsiveqarfimmi 47-mi umiatsiaaqqat atorlugit nutaamik qaleralinnialerniartunut akuersissutini tunniussisoqassanngilaq, ukuli ilanngunnagit:

- 1) Qinnuteqartut aqutsiveqarfimmi Upernavimmi aalajangersimasumik angerlarsimaffillit, aamma
- 2) inuussutissarsiutigalugu aalisartut aqutsiveqarfimmi 46-imi atuuttumik umiatsiaaraq atorlugu aalisarnermut akuersissutillit, immikkut pissutissaqarlutik aqutsiveqarfimmi 47-imi Qeqertarsuup Tunuanut Uummannamulluunniit nuuttut.
- 3) "Nutaamik qaleralinnialerniartut" tassaapput aalisartut ukiumi pisassiiviusumi qaangiuttumi aalisarnermut qinnutigineqartumut taamaaqataanik akuersissummik peqarsimanngitsut.

§ 5. Inuuniarnikkut aningaasaqarniarnikkullu pissutsinik isiginninnerit kiisalu uumassusilerisut biologit siunnersuineri tunngavigalugit ilanngussami 1-imi aqutsiveqarfiit aalajangersarneqarsimasut malillugit sinerissamut qanittumi qaleralinniarnermut pisassiissutit ukiut tamaasa Naalakkersuisunit aalajangersarneqartarput.

Imm. 2. Aqutsiveqarfinni Upernavimmi, Uummannami Qeqertarsuullu Tunuani angallatinut tamakkiisumik (l.o.a.) 6 meter sinnerlugu takissusilinnut immikkut pisassiissutini, taamatullu aamma umiatsiaaqqanut tamakkiisumik (l.o.a.) 6 meter tikillugu takissusilinnut immikkut pisassiissutini aalajangersaasoqassaaq.

Imm. 3. Aqutsiveqarfiit allat eqqarsaatigalugit angallatinut tamakkiisumik (l.o.a.) 6 meter sinnerlugu takissusilinnut ataatsimut pisassiissutini, taamatullu aamma umiatsiaaqqanut tamakkiisumik (l.o.a.) 6 meter tikillugu takissusilinnut ataatsimut pisassiissutini aalajangersaasoqassaaq.

§ 6. Angallatit tamakkiisumik (l.o.a.) 6 meter sinnerlugu takissusillit atorlugit qaleralinniarnermut akuersissutit uku tunniunneqartarput:

- 1) Aqutsiveqarfinni Upernavimmi, Uummannami aamma Qeqertarsuup Tunuani piffissami killiligaanngitsumi pisassallu annertunerpaaffissalerlugit aalisarsinnaanermut akuersissut.
- 2) Aqutsiveqarfinni allani sivisunerpaamik ukiumut ataatsimut killilikkatut pisarineqarsinnaatitaasullu ataatsimoortut annertunerpaaffissalerlugit aalisarsinnaanermut akuersissutit, takuuk § 5, imm. 3.

§ 7. Aqutsiveqarfinni Upernavimmi, Uummannammi aamma Qeqertarsuup Tunuani qaleralinniarnissamut akuersissutit aqutsiveqarfinni pingasuni taaneqartuni tamani atorneqarsinnaapput.

Imm. 2. Aqutsiveqarfinnut allanut imm. 1-imi taaneqanngitsuni akuersissutit aqutsiveqarfinni tamakkunani tamani imm. 1-imi taaneqanngitsuni atorineqarsinnaapput.

Inuussutissarsiutigalugu qaleralinniarnermi piniutit atorineqartut

§ 8. Qassutiniq qalorsuarsorluniluunniit inuussutissarsiutigalugu qaleralinniarneq inerteqqutaavoq.

Imm. 2. Kommunit ileqqoreqqusaliaanni imm. 1-imi immikkut akuersissuteqarsinnaanermut malittarisassanik erseqqinnerusunik aalajangersaasoqarsinnaavoq, taamaalluni aalisarfinni piffissanilu killilersorsimasuni qassusersorluni aalisarnissaq akuerineqarsinnaavoq.

Imm. 3. Taamaattorli Aalisarnermut, Piniarnermut Nunalerinermullu Naalakkersuisoq, qassusersorluni aalisarneq piffissami aalajangersimasumi matuneqassasoq aalajangiisinnaavoq, tak. imm. 2, tamanna pisassiissutitigut pissutsit pisariaqartilerpassuk imaluunniit qalerallit tunisassiarineqarnerisa pitsaassusaat pitsanngortinniarlugu.

§ 9. Aalisarunnaartoqartillugu aalisartoq pineqartoq pisariaqanngitsumik kinguarsaanani atortumi qaqqinnissaanut pisussaavoq.

Imm. 2. Qaleralinniarnermi atortoq atortunut allanut minnerpaamik 50 meterinik ungasissusilerlugu inissinneqassaaq.

Imm. 3. Atortut marluk nermussimatillugit, nammineq atortut killorlugit nermussimasut piiarneqartassapput.

Pineqaatissiinerit

§ 10. § 3, § 4, imm. 1, § 8, imm. 1, imm. 2 aamma imm. 3 taamatullu § 9, imm 1 aamma imm. 2-mik unioqqutitsinerit Kalaallit Nunaanni pinerluttulerinermut inatsimmi malittarisassat malillugit akiliisitsinerimik arsaarinninnermillu pineqaatissiissutigineqarsinnaapput.

Imm. 2. Pinerluttulerinermut inatsimmi malittarisassat malillugit inatsisilerinermut tunngatillugu inuttut naatsorsuussaasut taamatuttaaq imm. 1-imut ilaapput.

Imm. 3. Imm. 1 aamma 2 malillugit suliat Kalaallit Nunaanni Eqqartuussivimmut suliaqartussatut siullertut suliaqartutigineqassapput.

Imm. 4. Imm. 1-3 malillugit akiliisitsinerit aalajangersarneqartut Nunap Karsianut pisassanngortinneqassapput.

Atuutilerfia

§ 11. Nalunaarut 1. januar 2021-imi atuutilerpoq.

Imm. 2. Peqatigitillugulu Sinerissap qanittuani qaleralinniarneq pillugu Namminersorlutik Oqartussat nalunaarutaat nr. 11, 28. august 2014-imeersoq atorunnaarsinneqarpoq.

Jens Immanuelson

/

Jørgen Isak Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut